



LINYON

Piblikasyon Linyon Demokratik Seselwa

Vol. 4

No. 5

Le 7 Zen, 2019

- REFERENDUM -

En Bwe pour Danny anpandan

Nou konstitisyon i donn tou nou sitwayen drwa pour partisip dan politik e sa i enkli drwa vote. LDS i respekte sa drwa. Nou osi respekte drwa lepep Seselwa pour pran desizyon pour nou pei.

Me lafason ki Msye Faure in lev sa size drwa vote pour lep-Seselwa ki pe viv a letranze i bizar. Nou pa konpran ki son vre lentansyon.

Msye Faure in sey fer sa dan en manyer ki al kont nou konstitisyon e nou lalwa. Se akoz sa ki in bezwen fer mars aryer.

Konstitisyon i demande ki en referendum i bezwen baze lo en lalwa ki met kler ki keston nou demann dimoun



pou vot lo la, ki poursantaz ki bezwen pour aprouve e ki konsekans sa desizyon pou annan.

Nou pa kapab demann Seselwa vot lo sa san eksplik tou sa la.

Msye Faure in sey kontourn konstitisyon e sa, pour en Prezidan, i en fot grav ki met nou sistenm demokrasi an danze.

Dan nou pei ozordi i annan bokou defi ki nou pe demann Prezidan donn lanmen pour rezourd. Sa i enkli fer desann pri lavi e elimin koripsyon. Lekzanp konkret se pratik komers STC e bann later leta ki'n ganny pran an bonavini par Parti Msye Faure e bann avek koneksyon politik.

Referendum ki Msye Faure in demande i zis en distraksyon akoz i pa oule get bann problem ki annan.

Komisyon elektoral i annan en kantite travay devan li pou delivre en eleksyon Prezidansyel ki onnet, zis e kredib. Se sa ki Msye Faure pe sey detournen. Nou pa kapab les li zve sa zve.

LDS : En Rasanbleman Kouler



Sa portre i annan en mesaz.

Nou en parti tou kouler

Bann MNA LDS i oule montre ki nou parti i en rasanbleman pour tou Seselwa, e ki i pare pour met ansanm tou kouler politik. Sa i reflekte bann kouler ki dan paviyon LDS e osi nou bann kouler nasyonal.

Seselwa pe ralye deryer LDS - Miting Piblik Praslin -



En gran nonm dimoun in rasanble lo laplenn Amitye Grand Anse Praslin Dimans pase pour temwany zot sipor pour LDS.

In annan bann siporter ki'n la depi lontan me osi nouvo ki pe ralye deryer LDS akoz i sel parti ki pe adres konsern Seselwa ozordi.

Parey dan tou miting piblik ki nou'n fer, dimoun in ekout atantiman bann dirizan LDS lo bann size ki konsern nou tou a se moman.

La nmizik ek sanson i touzour annan en par enportan dan nou rasanbleman. Bann santer popiler, parey Ras Ricky dan sa portre, in fer lafoul sante, ek bann sanson ki touzour annan en mesaz politik.

Sa miting piblik ti vin apre ki bann zofisyé LDS ti'n vizit bann zabitan distrik Baie Ste. Anne pour ekout zot konsern.

Sa wikenn, zofisyé parti pou vizit La Digue e pou fer en miting avek zabitan sa distrik dan Sant Kominoter, La Passe.

LDS pou kontinye batay lo saler

Prezidan Faure in anmenn Spiker Nicholas Prea ankour akoz desizyon Lasanble Nasyon pou vot an faver menm logmantasyon pour tou travayer sekter piblik e rezet son lord 5% pour tou.

LDS i kwar ki sa aksyon i menas son responsabilite e son privelez pour pas lalwa.

Alor i pou konteste avek tou mwayen sa aksyon ki prezidan in pran kont Spiker. La, sa zafer in ariv devan lakour siprenm.

LDS i reasir tou travayer piblik ki i pou kontinye ensiste lo en logmantasyon ki pli zis pour bann ki ganny mwens. Nou kwar ki zot pou ganny lazistis a lafen.

LEKO

Divorse,

.....Remarye?

Zis menaz politik

Msye Faure in anonse ki i pe met son kandidatur pour Eleksyon Prezidansyel, e ki i pe demann Parti US pou sponsor li. Sa i apre ki i ti'n dekile avek Parti.

Sa taktik i tipik bann manev Danny Faure.

Ler i neseseur pour li dekile avek parti US akoz i pa anvi pran responsabilite pour bann keksoz ki'n pase, i dir i napa nanryen pou fer ek zot. Me ler i war ki i pa pou al lwen li toussel, i retourn dan berkay.

Taktik Danny Faure pou sey zwe endepandan pa'n konvenk person. E sa nouvo taktik osi pa pou marse. Tou sa la i zis loportinis politik. Se en maryaz de konvenyans.

Loulou anba lapo mouton?

En MNA ki'n ganny elekte i annan responsabilite pour koz pour zabitan son distrik avan tou. I pa forse siport desizyon ki son parti in pran si i al kont lentere dimoun ki'n met li dan Lasanble.

Se sa ki Parti US pa'n aksepté dan manyer zot in tret MNA Grand Anse Mahe, Waven William.

Zot in fer li remontrans e tir li lo serten komite. Me pourtan, Parti US i dir ki i kwar dan lademokrasi. Eski zot zis loulou anba lapo mouton?

**Lasosyasyon Madanm LDS
SPONSORED WALK**

**Sanmdi le 20 Zilyet 2019 - Anse Aux Pins pour Anse Royale
Vini ou osi : Kontakte Tel. 4321122**